

# Имде лий



0+

1933 ий 1 февраль годсек лектеш.

## Юзо теле каныш



Даша АНТОНОВА ден Саша ИВАНОВ (Шернур посёлко).

Юзо шўлышан, куан дене темше теле каныш мучашке лишемын. Поро шарнымаш чоным ий мучко ырыкташ тўналеш. Каникулышто капкылым шуараш, уш-акылым виягдаш, пўртўс лонгашке лектын, яндар юж дене шўлалташ, лумъенгым ненчаш жап ятыр лийын. Ме Ксения йолташ ўдырем дене чыла ыштен шуктенна (снимкыште). Ик кечат арам эртен огыл. Сўретленна, шер пырче гыч кидшолым, шергашым ыштенна. Ялыште ковам дене уна лийынна, пий дене модынна. Тушто пўртўсшў могай мотор! Пушенге-влак ош тувырым чиен шогалыныт, пўрт-шамыч ош шовычым пидыныт, шонет. Йошкар-Олашке мийымына эн кугу шарнымашым коден. Кугу у ий кожым ужынна, коньки дене шер теммеш мунчалтенна. Теле каныш, тау тыланет!

Алина СУББОТИНА.

2-шо номеран Морко школ.



Давид ТИМОФЕЕВ (Волжск ола).



Фото-влакым еш архивла гыч налме.





# Лийже пүсө перада!



13 январь — Российысе печать кече.

Российысе журналист-влак 13 январьыште профессиональный пайремнам палемдена. 1703 ийыште Петр I кугыжан кўштымыж почеш «Ведомости» икымше газетым лачты кечын савыктен луктын.

Марий Эл Республикысе журналист-влак ий еда усталыкыштым Марий Эл Правительствын премийжылан увертарыме конкурсышто тергат. Тений «Шортньо пера» премийым «Марий Эл Радион» тўн редакторжо Владимир Матвеев сулен. «Йоча да самырык-влакын проблемыштым ончыктыммо эн сай паша» номинацийыште «Молодёжная жизнь в Марий Эл» газетын коллективыше ойыртемаптын.

«Ямде лий» газетын пашаенже-влак (снимкыште) тўрлө конкурсышко ушненыт. Христина Александрова ден Елена Иванова «СМИ-ротворец-2022» всероссийский конкурсын Юл кундем федерал округысо йыжыныштыже тагасеныт. Нунын материалышт 154 эн сай паша радамыш логалын.

Елена Иванова Российысе калык-влакын тўвыра поянлыкышт идалыкклан пөлеклалтше республикысе конкурсышто «Культурным народным традициям жить и крепнуть!» тагасыште сенышыш лектын.

Шокшын саламлена! Ончыкыжымат перада пүсө лийже!

Л.ГРИГОРЬЕВА.

## Арня еда вучем

«Ямде лий» газетым кажне арнян куанен вучем. Тудым коча-ковам, авам, кокам, акам лудыныт да мыйымат кумылан денит. Кочам сылнымутым йоратен, ятыр почеламутшо газетлаш савыкталтын. Алёна кокам юнкор слётышто лийын. Настя акам лауреат лўмым сулен. Мыят нунын деч вараш ынем код. «Ямде лий» газет, шушаш почмо кечет дене саламлем! Кужу ўмырым тыланем!

Артём ИВАНОВ.

Йошкар-Ола, 24-ше номеран школ.

## «Кадр» эн ончылно

5-9 январьыште самырык-влакклан СМИ ден киностудийшамычын «Волжские встречи-33» тўнямбал фестивалышт Озан олаште эртаралтын. Тушко Российын кумло кум регионжо гыч 500 наре ўдыр-рвезе ушнен. Нуно тренингыште, мастер-классыште, викториныште уш-акылыштым тергеныт да вияндыныт. Йошкар-Ола гыч «Кадр» документ киностудий «Новое детское кино» да «Народный проект» тагаслаште сенышыш лектын. Мария Куклиналан, Евгения Авдеевалан, Екатерина Соловьёвалан дипломым да чапле пөлекым кучыктеныт.

Х.АЛЕКСАНДРОВА ямдылен.



## Российысе увер

Спорт дене пентгыде кылым кучет? Сенгымашет ятыр? Капкылетым кузе шуарет? Фотом ыште але видеошко войзо да «Моя спортивная зима!»

всероссийский конкурсышко ушно. Паша ден йодмашым [talantonline.ru](http://talantonline.ru) сайтыш 20 февраль марте колтыман.

16-31 январьыште

9-11-ше класслаште тунемше да ача-ава-влакклан туныктыммо онлайн-квест яра эртаралтеш.

Ончыкылык профессиональный ойырыммо, ЕГЭ-лан ямдылалтме да кўшыл тунемме тонежыш тунемаш пурыммо шотышто пайдале ой-кагашым налаш лиеш. Тўрыс увер — [go.geekz.ru](http://go.geekz.ru) сайтыште.

4-16 ияш ўдыр-рвезе-

влак «Биоразнообразие —

сложная сеть жизни» тўнямбал усталык конкурсыш ушнен кертыт. Композицийым ыштыман але сўретым сўретлыман.

Йодмашым да пашам [education@davidsshepherd.org](mailto:education@davidsshepherd.org) адрес дене электрон почтыш

10 февраль марте колтыман.

## Марий Элысе увер

Йошкар-Оласе калык

арвер да сымыкыш тоштерыште Елена Ушакшан «Вниз по волшебной реке» ончерже почылтын. Капрон, меж гыч ыштыме Суртводьж, Соловей-разбойник, Вуверкува да моло герой-влак шкешотан да ойыртемаптыш улыт.

9-11-ше класслаште

тунемше-влакын

Всероссийский олимпиадыштын регионсысо йыжынже тўнгалын. Тудо 22 февраль марте шуйна. Ўдыр-рвезе-влак француз, немьч йылмыла, МХК дене шинчымашыштым тергеныт.

«Образований»

нацпроект почеш

2023 ийыште республикысе вич школышто спортзалым олмыктат. Тазалыкым шуарыме верлаште окнам, омсам вашталтат, кўварым ачалат. Тидлан 11 миллион тенге ойыралтеш.



## Тазалык эн шерге

Мыйын йоратыме уроком – физкультур. Тушто куржталына, торштылына, тагасена, ече дене коштына. Баскетболла да пионерболла модаш тунемынна. Мемнан туныктышына – Олимпиада Алексеевна Васильева. Тудо поро кумылан, йочам умылен мошта. Чын да порылык верч пенгыдын шогаш кумыланда. Тазалыкым изинек аралаш туныкта.

**Алмаз ГЕРАСИМОВ.**

Морко, Арын.



## Сүретче лийнем

Школыштына ятыр кружок пашам ышта. Кушташ, сүретлаш, түрлө поделкым ышташ туныктат. Куштымаш кружокыш нылымше ий коштам. Тудым В.А.Мамаева вүда. Ме концертлаште мастарлыкнам чүчкыдын ончыктена. Л.В.Соловьёва сүретлаш кумыланда. Мый, карандашым, чиям кучылтын, сүретым шочыкташ йоратем. Тыгай усталык авам деч куснен, шонем. Мыланем пүртүсым сүретлаш утларак келша **(снимкыште)**. Кушкын шумеке, сүретче лийнем.

**Настя СОЛОВЬЁВА.**

**У Торъял, Токтарсола.**

Фотом еш архив гыч налме.



## Герой дене вашлиймаш

Россий Герой С.В.Иштуганов дене вашлиймаш Арбор школышто лийын. Сергей Вячеславович илыш корныжо, ойырен налме пашаж нерген каласкален. Герой марла яндарын кутырен. Тидлан ача-аважлан таум ойлыман. Тудо мыланна тыршен тунемаш, туныктышым, ача-авам колышташ, жапым пайдалын эртара, спорт дене кылым кучаш тыланен. Ме Герой ончылно вуйнам савена. Мый Сергей Вячеславович дене кугешнем да тудын гай лияш тыршем.

**Виктория ШУБИНА.**

Марий Турек.



Фотом школ архив гыч налме.



## Түн оза – Мераг

У ий пайрем йоча-влакклан кечкунам эн вучымо да йоратыме. Советский районысо Михайловка түн школышто тудо веселан да порын эртаралтын. Пайрем кож воктеке йоча, туныктышо да ача-ава-влак ушненыт. Мурымаш, куштымаш, түрлө конкурс чылалан вий-куатым ешареныт. Йоча-влак ты пайремлан тыршен ямдылалтыныт. Визымше класкыште тунемше үдыр-рвезешамыч утларак чолга лийыныт: чыланат мераг костюмым ямдыленыт. Нуным руш да марий йылмылам туныктышо Э.Г.Степанова дене пырля снимкыште ужда.

**Э.СТЕПАНОВА.**

### Синквейн

Теле

Ояр, йүштө.

Модыкта, куандара, кандара.

Мыйын йоратыме пагытем.

Каникул.

**Андрей РЕПИН.**

Советский, Орша.



## Рошто пайрем



Сотнур черке пелен Рошто пайрем ёлкым эртаренна **(снимкыште)**. Пайремыш ача-ава-влак, Сотнур тўвыра рўдерын пашаенгышт ушненыт. 3-шо классыште тунемше үдыр-рвезе-шамыч Христосын шочмо кечыжлан пөлеклалтше мурым муреныт, почеламутым лудыныт. «Рождественский теремок» йомакым 2-шо классын изи артистше-влак модын ончыктеныт. Эн куандарыше татше – Йүштө Кугыза да Лумүдыр дене пырля түрлө модышышто, конкурсышто, викториныште вийым тергымаш. Игорь ача кажне йочалан пөлекым кучыктен.

**А. ЧЕРНОВА.**

Волжский район.



Фотом школ архив гыч налме.





## Тукым улына

– Урок деч вара йоча-шамыч дене шарадылан, ребуслан вашмутым кычалына. Шкеат шонен луктына. Марий книгам шергалына, марла почеламутым сылнын лудаш тунемына. Серызе-влакын пашаштым шымлена. Заметкылам возена, икте-весе дене кажашен төрлена да газетмышке колтена, – оила Олимпиада Алексеевна.

Ўдыр-рвезе-влак шочмо йылмын сӧраллыкше, шочмо кундем, верысе пӱртӱс, йӧратыме сомылышт, ача-авашт нерген возаш йӧратат. «Ямде лий» газетын толмыжым арня еда вучат да лаштыклаште лӱмыштым чон вургыж кычалыт. Тале юнкор-шамычын замет-

## Чоныштышт – сылнымут сескем

Морко район Арын школышко сылнымут «пушан» юж кумышлан шыген. Тушто марий сылнымутлан негызым пыштыше Сергей Чавайн тунуктен. «Ямде лий» газетын ончычсо тӱнг редакторжо, журналист, серызе Василий Крылов сылнымутыш ошкылым лач тушто ыштен. Кызыт «Сескем» кружок йоча-влакым юнкор пашалан кумыланда. Тудым тӱнгалтыш класслам тунуктышо О.А.Васильева вуйлата (снимкыште – йоча-влак дене пырля).



кыштым, йомакыштым, почеламутыштым куанен лудыт да нунын гай лияш тыршат. Кружокым арам огыл «Сескем» манын лӱмденыт. Тек изи тулойып кугу тулотыш савырна.

**Х.АЛЕКСАНДРОВА.**

## Шинчымаш памаш

Икана ковам деч йодым: «Самырыкет годым шуко книгам лудынат?» Тудо тыге вашештыш: «Книгам лудаш пеш йӧратенам. Йӧдымат понар дене волгалтарен лудынам. Марий сылнымутан произведенийлам поснак акленам. Кызыт те, самырык тукым, шагал лудыда. Арамлан огыл калыкыште книгам шинчымаш памаш дене танастарат. Уныкам, чӱчкыдынрак тудым кидышкет нал».

**Дима ВЕДЕНЬКИН.**

1-ше номеран Шернур школ.

## Вучымо теле

Телым вученам молан?  
Каласем мый кажнылан:  
Чапле ечым чиялам,  
Курькышко чымалтам.

Ўлык кӱшычын водем,  
Мардеж дене учашем.  
Ший коньки ден мунчалтем,  
У сӱретым сӱретлем.

Телым вученам молан?  
Каласем мый кажнылан:  
Мый лӱмӱенгым ненчынем,  
Лумым кышкылтын моднем.

**Ксения ИВАНОВА.**

Морко, Коркатово.

## Марий кружок лийшашак!

Самырык тукым шочмо йылмым йӧратыже, тудын ямжым шижше манын, ача-ава, тунуктышо-влак тыршышаш улыт. Мыйын шонымаште, кажне школышто марий сылнымут кружок лийшашак! Морко район Шӱргыял школ пелен «Марий сылнымут садвечыште» юнкор кружок ятыр ий пашам ышта. Кызыт тушто латкуд тунемше усталыкшым виянда. Ме заметкым, почеламутым, ойлымашым возаш, синквейным, кроссвордым ышташ тунемына. Возымо паша-влакым тӱрлӧ газетыш колтена. Лектыш куандарыше: «Ямде лий» газет рдакцийын эртарыме «Рвезе йӱк» конкурсышто ӱмаште кружок В.Б.Исенеков лӱмеш премийын лауреатше лийын. Ты чаплӱмым ме кокымшо гана суленна. Ончыкыжымат тыршен пашам ышташ мутым пуэна.

**Е.ГРИГОРЬЕВА.**

## Сенымаш куандарен

«Ямде лий» – эн йӧратыме газетем. Серышем-влакым тушко кажне гана уло кумылын колтем. Возимемым аклен, ӱмаште З.Е.Яковлева лӱмеш премийым кучыктеныт. Пӧлекше могай чапле! Саламлымаш М.Шкетан лӱмеш Марий драме театрыште эртаралтын. Тиде сенымаш мыйым возаш утларак шӱманден. Йоча-влак, тендамат сылнымут дене йолташ лияш ӱжам.

**Юля ЯГОДАРОВА.**

Советский, Кельмаксола.



## «Ямде лий» дене пырля

У ий пайремым кө ок йöрате?! Тений Шүдымарий школышто ойыртемалтше пайрем лийын. «Ямде лий» газет дене кылым кучышо ўдыр-рвезе-влаклан «Ямде лий» дене пырля» мероприятийым эртаренна. Школышто тунемше 73 йоча гыч 54 икшыве йоча газетым налеш. Ўдыр-рвезе-влаклан «Шонанпыл» театр кружок «Чик-чирик» калык йомакым модын ончыктен. «Ямде лий» газетын историйже дене палдарыме. Лотерей модышым эртарыме. Ик йочат пöлек деч посна кодын огыл. Вескана У ий пайремым йоча газетыште тыршыше пашаен-влак дене пырля эртараш кумыл уло.

**М.Н.САВЕЛЬЕВА, туныктышо.**

**Кужэгер район.**

«А» гыч «Я» марте

## Юзо газет

Айвика Бердеева – волонтер, газетын дизайнерже. Ешартышлан – журналист. Звенигово интернатысе йочалан книгалам лудын. Мемнам нуно очеркыштышт öрынрак палемденыт. «Русская словесность» творчествыштылан угыч ўшанен, чыланат шомакленыт. Ындыжым эн юзо – «Ямде лий»!

**«Русская словесность» кружокын енге-влак.**

**Волжский, Сотнур.**

## Лудаш темлем

Шукерте огыл «Вафельное сердце» книга лудынам. Тудым норвег писатель Мария Парр возен. Повестьыште Трилли лўман рвезе да тудын йолташыже-влак нерген ойлалтеш. Автор порылыкым, келшымышым, икте-весылан полшымышым ончыл верыш шында. Йолташ-шамыч, тиде книга тьландат лудаш темлем.

**Аня ВИНОГорова.**

**Звенигово, Шолэгер.**



**М о р к о** район Эгер-ўмбал ялеш шочшо Аркадий Букетов-Сайн **(снимкыште)**

лирике кумылан поэт лийын. Тений, 6 январьыште, шочмыжлан 90 ий темын. «Поэзий сылнылыкше дене сымыстара», – ачамын тыге ойлымышым шуко гана колынам. Почеламутым кок ияш улмыж годымак йöраташ тўналын. А.Пушкинын марий йылмыш кусарыме «Эр» почеламутшым куанен лудын. Вара шкежат возаш тўналын. Икымше почеламутшо Азъял школышто тунеммыж годым шочын. Шочмо ялышкыже икана Семён Вишневский толын

улмаш. Аркадий Иванович МАССР-ын калык поэтшылан почеламутшым ончыктен. Тыге возаш утларак кумылангын.

1952 ийыште Морко педучилище деч вара Н.К.Крупская лўмеш Марий пединститутын историко-филологический факультетышкыже тунемаш пурен. Дипломым налмеке, Морко районысо Шенше кыдалаш школышто руш йылме ден литературым, марий литературым, историйым туныктен. Урок деч вара «Сылнымут аршаш» кружокын вўден. Морко посёлкышто илымыж годым 1-ше номеран Морко школышто факультативный курсым эртарен, сылнымут дек шўмангден.

Ачам мыланем пример

15 январьыште  
МАССР-ын калык поэтше  
Миклай Казаковын  
шочмыжлан  
105 ий темеш.



- Шочмо верже – Морко район Кўчыкэгер ял.
- Икымше почеламутшо «Пионер йўк» журналеш савыкталтын.
- 1933 ийыште Кожлаер школым тунем пытарымек, «Ямде лий» газетыште пашам ышташ тўналын.
- 1938 ийыште икымше книгаже савыкталтын.
- Йошкар-Оласе учительский да Москово литературный институтлаште тунемын.
- 1951 ийыште Сталинский премийым налын.

Сылнымутан произведенийлам авторышт дене чын ушыза.

«Теле»	С.Чавайн
«Первый лум ўмбач»	Г.Микай
«Теле»	М.Казаков
«Теле тўс»	В.Колумб
«Ялыште теле»	М.Азмекей

**В.СМИРНОВ ямдылен.**



*Ушет уло – шонен кертат,  
уке – ефын ойым колышт тунем.*

**М.ШКЕТАН.**

## Вишневский кумылангден



лийын. Тудын гаяк ушан, чулым да уста айдеме лияш изинек шоненам. Ушыштем Аркадий Ивановичын мутшо эре пöрдеш: «Марий улам, шочмо йылмемым чот йöратем». Йоча-влак, марий йылмым куанен тунемза.

**И.БУКЕТОВА-АЛВИЙ.**

## Кугешнем!

Кö ончылта пашаште жапым,  
Налеш у кўкшытым сенен,  
Огеш луштаре илыш сапым –  
Мый тудын дене кугешнем!

Тыгайын шўм-чонеш регенче  
Ок нал – шолеш пиал сескем.  
Кид-йол модеш, паша волгенче  
Шыжа, пеледышла йолген.

Станок мура тудлан у гимным,  
Мыят у стихым пöлеклем  
Да сылнымут каваште лўмын  
Чатка у шўдырым чўктем.





**М**арий чодыраште маска еш илен. Маска ача кече еда пүртүс лонгаште коштын. Ешыжлан мүйым, энгыжым да моло түрлө кочкышым конден. Ава сурт сомылкам шуктен, Мишук эргыжым эскерен. Мом йодмыжым шукташак тыршен. Маскаиге мыняр шонен, тунар мален. Тамлын кочкын, кечым модын, төрштылын эртарен.

Йүран кастене омасшке Мераң тўкалтен да сөрвален йодын:

– Корнем кужу, нөренам. Поро лийза, йүр эртен кайымешке пуртыза.

– Мишукна мала, тебе помыжалтарет! Шайыкшинча, шке корнет дене кай! – шыдын пелештен Маска ава.

Кок арня гыч эше ик уна толын – шужен, явыген пытыше Пириге. Сөрвален-сөрвален, сукалтен шичшыла койын, кочкаш йодын. Маска еш тудымат поктен колтен. «Пырым йолжо пукша», – игылт воштылын Мишук.

Кечым кече поктен, тылзе эртен. Омасшке вучыдымын Уриге пералтен да шортын-шортын ойлен:

– Поро йолташем-влак, мый, укш гыч укшыш төрштылын, суртемым, ешемым йомдаренам. Ала корным ончыктеда?

– Шагалрак төрштылман.

Навигаторым чўктө. Авай, поктен колто! – кычыра-лын Маскаиге.

Идалык почеш идалык эртен. Мишук кушкын, а аваж ден ачаже эркин-эркин шонгемыныт. Мардежан игечыште суртоза торашке каен да пөртылын огыл. Маска ава ойгыраш тўналын да эргыжлан ойлен:

– Мишук, ачат азапыш логалын, очыни. Тый ынде изи отыл, патыр улат. Ала кычалаш кает?

– Йөра-а-а. Ка-а-е-ем, кычал онче-ем, – йогыжым сенаш тыршен вашештен Маскаиге.

## Ур Маскам утарен

Йомак



Мишук корныш тарванен. Пеленже кочкышымат налын огыл: нелым нумалаш өрканен. Кудалын-кудалын, Мераңым вашлийын.

– Шайыкшинча, ачамым ужын отыл? – йодын. Мераң Маскаигым шөрын ончалынат, вондер коклаш пурен йомын.

Рүмбалгаш тўналын. Маскаиге умбакыже ошкылын. Тудо пеш ноен, моткоч шужен. Кож йымалан тулотым ылыжтен, кочкаш ямдылыше пире ешым ужын. Тутло пуш Мишукын нержым чыгылтен. «Ух, мўшкыремым теме-е-м», – шке семынже шоналтен.

Нунын дек лишемын, лўдырак ойлен:

– Пире тос-влак, мый ачамым кечыгут кычалам. Моткоч шуженам, пукшыза мыйым. Сөрвален йодам.

Но пире-влак төрштен кыненын поктен колтеныт.

Маскаиге, вуйым сакен, шўвылвўдым нелын, умбакыже ошкылын. Кенета вуйышкыжо пўгыльмө камвозын. Кўшкө ончалын – Ур.

– Йолташем, тый пушенге гыч пушенгыш төрштылат. Ала ачамым ужынат? – йодын.

Ур тудым поктен колтышо Мишукым пален налын гынат, тореш вашештен огыл.

– Тораште огыл сусыргышо Маскам ужинам ыле. Лишемаш лўдынам. Ала тиде тыйын ачат лийын? Айда почешем, вараш ит код, – Ур ойлен.

Кудалын-кудалын, йөрлшө пушенге дек миен лектыныт. Мишукын ачажак лийын улмаш. Мөнтө кузе каяш? Кўсеныштыже смартфонжо улмым трукышто шарналтен да вашкепольшым ўжыктен. Мишук Урлан кугу таум ойлен.

Суртоза, төрланымекше, Мишуклан порылык нерген кужу жап умылтарен:

– Еңлан поро пашам отыште гын, тыланетат нигө огеш полшо. Арам огыл ойлал: «Поро паша поро дене пөртылеш, осал – осал дене». Мемнан чодыраште поро янлык-влак илат. Кажныжым пагалыман.

Тылеч вара маска еш Мераң, Пире, Ур да моло янлык-шамыч дене келшен, икте-весым пагален илен.

**Е.ВОЛКОВА.**

**Медведево, Кома.**

**Нине герой-влак могай руш йомакла гыч улыт!**





## Теле каныш

Ялна деч тораште огыл Карман курык уло. Ме, йоча-влак, тўшкан погынен, тушко вашкена. Икте издер дене, весе ече дене мунчалтена. Шуко йочалан ватрушко дене мунчалташ келша. Кугу курык гыч волаш моткоч онай.

Кира СМЕРНОВА.



Мый ече дене мунчалташ йоратем. Ял воктенесе курык гыч пикшла водем. Ечемже писын чыма, торашке нангая. Сай ече, чапле кече, кугу курык кумылем нолтат.

Артём АЛЕКСЕЕВ.  
Морко, Коркатово.

### Калык пале

- ➔ Тылзе лоптыран шочеш – поранан игечылан.
- ➔ Шогертен суртпечеш шылеш – поран толеш.
- ➔ Телым пёртйымалне ужава кычкыра гын, лум лиеш.



Михаил ГУБАШОВЫН сўретше.  
Медведево, Руэм.

## Ну, чыталте!

Пире ден Мераҥ мороженныйым налаш каеныт. Пире ойла: «Мый кугурак улам, сандене кумытым налаш, а тый изи улат, кокытым веле нал». Мераҥ ты ой дене келша. Пире кум лумэгерчым налеш гын, Мераҥ – кок гана кок порцийым. Пире мороженныйым нулен пытарат, Мераҥым ончалын кычкыралеш: «Ну, Мераҥ, чыталте!»

Пире молан сырен?



Ик кубометр лумышто – 350 миллион лум пырче.



Лум пырчын 95 процентше – пар.

Лум пырче ик шагатыште индешшүдө метрым чонешта.



Сўретым чиялтыза.

<b>ТЕАТР</b>	<b>ШКЕТАНА</b>
<p><b>20 январь</b> 18:00 <span style="background-color: red; color: white; padding: 2px;">ПРЕМЬЕР</span></p> <p>И. Горди <b>ТЕРГЫШЕ</b> Комедий</p>	
<p><b>21 январь</b> 16:00</p> <p>С. Пектеев <b>ЙЫВАН КЫРЛА. ПУТЁВКА В ЖИЗНЬ</b> Документальный драме</p>	
<p><b>27 январь</b> 18:00 <span style="background-color: red; color: white; padding: 2px;">ПРЕМЬЕР</span></p> <p>В. Пектеев <b>ЙОРАТЫМАШЫН АКШЕ</b> Комедий</p> <p>Цена любви Рекламе.</p>	

«Ямде лий» газет  
Тўн редактор  
Л.Н.ГРИГОРЬЕВА.  
Индекс: П4696.  
Тираж 1550 экз. Заказ  
Формат – А-4-8.

[https://vk.com/yamde\\_lii](https://vk.com/yamde_lii)  
<https://t.me/yamdellii>  
E-mail: [yamde\\_lii@mari-el.ru](mailto:yamde_lii@mari-el.ru)  
(документ кагазлан),  
[yamde\\_lii@mail.ru](mailto:yamde_lii@mail.ru)  
(автор-влаклан)  
Сайтын адресше: [yamdeliiy.rf](http://yamdeliiy.rf)

**УЧРЕДИТЕЛЬ-ВЛАК:** Марий Эл Республикысе культуру, печать да калык-влакын пашашт шотышто министерстве, «Кугарня» газет» кугыжаныш унитарный казна предприятий.

Газетым редакцийыште погымо да верстатлыме, «Марий Эл Республикысе Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112.

Газетым Кыл, информационный технологий да массовый коммуникаций сферым эскериме шотышто федеральный службын Юл кундем федеральный округысо управленийыштыже регистрироватлыме.  
Номер – ПИ № ТУ52-01335,  
2021 ий 29 сентябрьыште пуымо.

**0+** Печатьыш пуымо жап – 14-00, фактически – 13-00

Авторын да редакцийын шонымышт тўрлб лийын кертыт. Серыш-влак монтеш огыт колталт. Ак – кутырен келшыме почеш.

Редакцийын да издательнын адресше: 424006, Йошкар-Ола, СССР Вооружённый Вийын 70-ше идалькше урем, 20-шо пёрт. Тел. 8(8362) 45-22-82(факс).



Ешартыш лайкым кузе погаш? У КОНКУРС

400 лайк:


2023 ийын икымше пелий-жылан «Ямде лий» газетлан почто гоч подпискым ышташ да квитан-цийжым але тудын копийжым редакцийышке колташ.

200 лайк:

электрон подпискым ышташ. 89027382237 телефон номер дене Сбербанкыш оксам колташ але тиде номерышке 150 тенгем пышташ. Электрон почтыдан адресшым возен колташ ида мондо. Редакций гоч подпискым ыштышат тынар лайкым налеш.

Ушештарена:

мын я р шукурак подпискым ыштеда, тунар шукурак лайкым погаш йон лиеш. Тугеже газетлан возалташ родо-тукумдамат ушен кертыда.



Шуко кайык тельлан шокшо элышке чонгештен кая. Южышт мемнан дене кодыт.

Уремыште йүштө, кочкыш уке. Шулдыран йолташна-влаклан кузе лийман? Нуно мемнан деч польшым вучат. Удыр-рвезе-шамыч, кайык үстелым ямдыленда? Тамле кочкыш дене сийледа? Кормушыкыда дене моторын войзалтын, фотом [https://vk.com/yamde\\_lii](https://vk.com/yamde_lii) тўш-кашке сообщений дене колтыза.

Паша-влакым газетеш да группеш верандена. Эн шуко лайкым погышо постын озаже сенышыш лектеш. Тўткө лийза! Йўклышö «Ямде лий» – марла йоча газет» тўшкан под-писчикше лийшаш.



Сенышым чапле пöлек вуча.



Александра ВАСИЛЬЕВА. Звенигово, Сўзлэнгер.

«Хранители птиц» всероссийский акцияш ушнышо фото.

Фотом 3 март марте колтыман.

Кайык-влакын лўмыштым муза.

Ш	Ш	П	Ч	А	Н	А	К	Ы	Р	С
И	Е	Ы	Ш	И	Ш	Д	Э	Р	О	Ш
Ш	М	З	Ш	М	А	Т	Ю	Ы	Л	О
Т	Г	Л	И	Е	Х	К	И	С	А	Г
Э	О	Ы	Ш	О	Г	Е	Р	Д	Г	Е
Р	Р	Ш	Т	О	Р	Ö	Р	Ш	О	Р
Д	А	Н	Е	М	Ы	Ж	Е	Н	Р	Т
Е	К	О	Р	А	Т	У	Р	Н	Я	Е
Т	У	Р	И	Й	Р	О	К	Ы	П	Н

Маша МАКСИМОВА.

Советский, Öрша.

Киса эр годсек мура гын, игече йўкшемда.

Калык пале.



Айста модына


Таве

Ты модыш дене рвезе-влак модаш йöратат. Тавым ышташ йöсö огыл. Икмыняр воштырым ўмба-ла оптыза – теве ты-ланда яндар вўдан «та-ве» ямде. Но кузе тудын вўдшым кошталаш? Ведра уке, тавыш пур-ренгаен. Лукташ күлеш. Йоча-влак модыш вед-рам шке ыштыме эгыр дене лукташ тöчат. Но петырыме шинча дене тудым лукташ куштыл-гак огыл.

Келшыше тумышым кычалза.



Могай мут лектеш!



Түшто

Ош лыве семын кўшыч модын, Кокланже ший гай йылгыжал, Эрдене, кечывалым, кас водын. Вола кава гыч, шыргыжал.

Лумьен-влакым шотлыза да клеткылашке возыза.

Интернетысе сўрет-влакым кучылтмо.